

Headlines

- 1 प्रधानमंत्री नरेंद्र मोदी हों आखेआ ऐ जे भारत सेमीकंडक्टर दे खेत्तर च माल तैयार करने दे मामले च दुनिया दा इक प्रमुख केंद्र बनने लेई तैयार ऐ।
- 2 मुख सचिव अटल डुल्लू हों विश्व बैंक दी माली मदाद कन्नै चलाए जा'रदे झेहलम तवी फ्लड रिकवरी प्रोजेक्ट तैहत जारी कम्मों दी प्रगति दा जायजा लैता।
- 3 उपराज्यपाल मनोज सिन्हा हों परेड ग्राउंड जम्मू च सिंथेटिक फुटबाल टर्फ दा उद्घाटन कीता। उनें आखेआ जे पंचैती सतह पर हुनरमंद ते काबिल खड्डारिएं दा पता लाने लेई चलाए गेदे अभियानें दे खरे नतीजे थोआ करदे ना।
- 4 उधमपुर च मतदाताएं गी जागरूक बनाने लेई स्वीप योजना तैहत कार्यक्रम दा आयोजन कीता गेआ।

<><><><><><>

PM-Modi Semi conductor

प्रधानमंत्री नरेंद्र मोदी हों विश्वास जाहिर कीता ऐ जे भारत औने आले समें च सेमीकंडक्टर विनिर्माण च इक वैश्विक केंद्र ते उद्योग 4 च अगुवाह बनने आस्तै तयार ऐ। ओहू अज्ज वीडियो कांफ्रेंस राएं सवा लख करोड़ थवां मती दी त्रै सेमीकंडक्टर परियोजनाएं दा नीहू पत्थर रखने मगरा संबोधित करा'रदे हे। इनें परियोजनाएं च गुजरात दे धोलेरा खास निवेश क्षेत्र च मुख दा पैहला वाणिज्यिक सेमीकंडक्टर फैब, असम दे मोरीगाव च आउटसोर्स सेमीकंडक्टर असैम्बली ते टेस्ट सुविधा ते गुजरात दे सानाद च आउटसोर्स सेमीकंडक्टर शामिल ना। प्रधानमंत्री हों आखेआ जे सेमीकंडक्टर उद्योगें दा लाहू युवाएं गी थोगा। प्रधानमंत्री हों आखेआ जे पूर्वोत्तर राज्य दखन पूर्व एशियाई मुखें कन्नै जुड़ने आस्तै मजबूत होआ करदे ना। प्रधानमंत्री हों आखेआ जे सरकार नै बपार करने गी सखल्ला बनाने पर ध्यान केंद्रित कीता ऐ ते 40 जहार थवां मते पराने नियमें गी खत्म करी दित्ता ऐ। टाटा इलेक्ट्रानिक्स प्राइवेट लिमिटेड 91 जहार करोड़ रुपें दे कुल निवेश कन्नै धोलेरा खास निवेश क्षेत्र डी.एस.आई.आर च फ़ैब्रिकेशन सुविधा दी स्थापना करा रदा ऐ। एहू मुख दा पैहला वाणिज्यिक सेमीकंडक्टर फैब होगा।

<><><><><><>

IIT Jammu PM

आई.आई.टी. जम्मू दे डेड सौ शा मते विद्यार्थिएं, शैक्षणिक अमले ते होरनें अधिकारिएं कर्मचारिएं अज्ज प्रधानमंत्री नरेंद्र मोदी हुंदे आस्सेआ त्रै सेमीकंडक्टर सुविधाएं दे नीहू पत्थर रखने आले कार्यक्रम दा लाइव प्रसारण दिक्खेआ। आई.आई.टी. जम्मू दे इलेक्ट्रिकल इंजीनियरिंग विभाग च असिस्टेंट प्रोफेसर डाक्टर अंबिका प्रसाद शाह हों दस्सेआ जे आई.आई.टी. जम्मू नै किस चाल्ली अपने आपै गी भारत दे सेमीकंडक्टर मिशन कन्नै जोड़े दा ऐ। डाक्टर अंबिका शाह हों नमिएं काहडें गी बढ़ावा देने च आई.आई.टी. जम्मू दे जोगदान ते विकसित भारत पैहलकदमी लेई आई.आई.टी. दी शमूलियत राहें हासिल प्रगति पर बी लोड पाई। इस कार्यक्रम दा मकसद मुखैं अंदर सेमीकंडक्टर विकसित करने दे जत्तें पर ध्यान केंद्रित करना ऐ तां जे आयात पर निर्भरता गी घट्ट करदे होई घरेलू तकनीकी उद्योग गी बढ़ावा दित्ता जाई सकै।

<><><><><><>

Chief-Secretary

मुख्य सचिव अटल डुल्लू होरें विश्व बैंक दी माली मदद कन्ने चलाए जा'रदे झेलम तवि फ्लड रिकवरी प्रोजेक्ट तैहत जारी कम्में दी प्रगति दा जायजा लैता। एहूदे अलावा उनें शिक्षा सेहत, आपदा प्रबंधन, रोजगार ते आजीविका सृजन दे क्षेत्र च ढांचागत विकास दे कम्में बक्खी बी चेचा ध्यान देने लेई आखेआ। उनें मते महत्व आले कम्में गी पैहल दी विनाह पर तेजिया कन्ने तोड़ चाढ़ने लेई आखेआ। अटल डुल्लू होरें बक्ख-बक्ख मैहकमें बश्कार नेइमें तालमेल पर जोर दित्ता ते आखेआ जे मिथे गेदे समें दे अंदर-अंदर तोड़ चाढ़ने पर जोर दित्ता।

<><><><><><>

LG-Sinha

उपराज्यपाल मनोज सिन्हा होरें आखेआ ऐ जे पिच्छले किश बरें दरान केंद्र शासित प्रदेश च खेडूदे सरबंधी ढांचे गी बड़ा बढावा थ्होआ ऐ ते स्हाडे खड्डारिएं राश्ट्री ते अंतरराश्ट्री सतह पर अपना नांश रोशन कीता ऐ। परेड ग्राउंड जम्मू च सिंथेटिक टर्फ फुटबाल स्टेडियम दा उद्घाटन करने, केई सारी खेडू सुविधाएं दा नीहू पत्थर रक्खने ते बड़े बेहतरीन खड्डारिएं गी सम्मानित करने दे मौके बोलदे होई श्री सिन्हा होरें आखेआ जे खेडू कौंसल आस्सेआ बेहतरीन खड्डारिएं दा पता लाने लेई पंचैती सतह तोहड़ी जत्त कीते जा'रदे न। एलजी होरें आखेआ जे नमीं खेडू नीति दा गठन कीता गेदा ऐ ते खड्डारिएं गी एहूदे लाहू हासल होना शुरू बी होई गेदे न। उनें आखेआ..।

<><><><><><>

Fisheries-Ramban

रामबन जिले दा मच्छी पालन मैहकमा इस प्हाडी जिले दे दूर-दरेडे इलाकें च मच्छी पालन दिएं नमिएं तकनीकें गी अपना करदा ऐ। मैहकमा उत्थे प्राइवेट मच्छी पालन इकाइएं च ट्राउट मच्छी पालन गी बढावा देने बक्खी कम्म करा रदा ऐ। कृषि क्षेत्र दे पूरे-पराते विकास सरबंधी एच.ए.डी.पी कार्यक्रम तैहत नमीं मच्छी पालन इकाइएं लेई लाभार्थिं गी पौने त्रै लक्ख रपे दी सब्सिडी पर नमीं इकाई लाने लेई मदद दित्ती जाग। हाल च गै जिले दे नील, गूल, बनिहाल ते बटोट इलाके च 7 नेहियां इकाइयां खोलियां गेइयां न। जिले दे रामबन ते बनिहाल इलाके च दऊं सिखलाई केंद्र बी ऐन। इस बारै आकाशवाणी कन्ने गल्ल करदे होई डरैक्टर मच्छी पालन रामबन फयाज अहमद फयाज़ होरें आखेआ।

<><><><><><>

Electoral-Bonds

भारती स्टेट बैंक नै सुप्रीम कोर्ट गी एहू जानकारी दित्ती ऐ जे पैहली अप्रैल 2019 थमां लेइयै इस ब'रे 15 फरवरी तगर सियासी पार्टिं कुल 22 ज्हार 217 चुनावी बांड खरीदे ते 22 ज्हार 30 चुनावी बांड दा इस्तेमाल कीता। सर्वोच्च अदालतै च दायर इक हल्फनामे च एस.बी.आई नै आखेआ ऐ जे अदालत दे दिशा-निर्देशें मुजब उनें 12 मार्च गी कारोबारी कम्मकाज आह्ला समें खत्म होने शा पैहले भारती चुनावी आयोग गी चुनावी बांड दे सब्बे ब्यौरे उपलब्ध करोआई दित्ते हे एसबीआई नै आखेआ ऐ जे हर इक चुनावी बांड गी खरीदने दी तरीक, खरीदने आहले दा नां ते ओहूदी कीमत सरबंधी सब्बे ब्यौरे जमा करोआई दित्ते गेन। सर्वोच्च अदालतै चुनावी आयोग गी इब्बी निर्देश दित्ता हा जे ओहू 15 मार्च गी संझा 5 बजे तगर बैंक आस्सेआ सांझे कीते गेदे ब्यौरे गी अपनी वैबसाइट पर सांझा करै।

<><><><><><>

Udh. SVEEP

उधमपुर दे शहीद भगत सिंह पार्क च मतदाताएं गी जागरूक बनाने सरबंधी स्वीप अभियान तैहत खरी मती गिनतरी च लोकें शिरकत कीती। इस कार्यक्रम दा मकसद मकामी लोकें ते खास करियै नौजोआनें दा दिल बधाना हा तां जे ओहू औंदे चुनावें च

वोट पाने दे अपने हक्के दा इस्तेमाल करन। उधमपुर दी जिला पंचैत अधिकारी प्रीति शर्मा होरें आकाशवाणी समाचार कन्नै गल्ल करदे होई आखेआ।

<><><><><><>

NHAI-Fastag

राश्ट्री जरनैली शिड़कें सरबन्धी भारती प्राद्यिकरण एन.एच.ए.आई नै पे.टी.एम दा फास्ट-टैग इस्तेमाल करने आहलें लेई सलाह जारी करियै उनेंगी आखेआ ऐ जे ओहू औंदी 15 मार्च शा पैहले-पैहले कुसै होर बैंक दा फास्ट-टैग इस्तेमाल करना शुरू करी देन। शिड़क, ट्रांसपोर्ट ते राश्ट्री जरनैली शिड़कें सरबन्धी भारती प्राद्यिकरण मुजब ईआं करियै राश्ट्री जरनैली शिड़कें पर सफर दरान लगाने आहले जुर्माने ते दोहे शुल्क कोला बचने च मदाद मिलोग। भारती रिजर्व बैंक आस्सेआ पे.टी.एम पेमेंट्स बैंक पर लाई गेदी पाबंदिएं बारै जारी दिशा-निर्देशें मुजब, पे.टी.एम फास्ट-टैग इस्तेमाल करने आहले इस म्हीने दी 15 तरीक दे बाद अपना फास्ट-टैग रिचार्ज नैई करी सकडन। उआं ओहू फास्ट-टैग च पैहले थमां पेदे पैसें दा इस्तेमाल इस तरीक दे बाद बी टोल टैक्स अदा करने लेई करी सकडन।

<><><><><><>

Polytechnic Ramban

हुनर विकास मैहकमे दे मिशन यूथ प्रोग्राम तैहत अवसर स्कीम दे हिस्से दे तौरा पर रामबन जिले दे चंद्रकोट पालीटेक्निक कालेज च 30 सखेत्रुएं गी 100 घटें दे कम्प्यूटर कोर्स दी सिखलाई दिती गेई। सरकारी पालीटेक्निक कालेज चंद्रकोट दे प्रिंसीपल विकास महाजन होरें जानकारी दिती ऐ जे इस कार्यक्रम दा मकसद मकामी नौजवानें दी प्रतिभा गी पंछानना ऐ ते उनेंगी कम्म-रोजगार दे मौके उपलब्ध कराना ऐ। आकाशवाणी कन्नै गल्ल करदे होई इक सखेत्रु नै आखेआ..।

<><><><><><>

Bhaderwah

डोडा जिले दे 30 विद्यार्थिएं दे इक समूह गी अज्ज भद्रवाह थमां भारत दर्शन लेई रवाना कीता गेआ। सी.आर.पी.एफ दी 33 बटालियन दे टू.आई.सी सेकंड इन कमांड तरीश मेहता होरें उनेंगी झंडी दस्सिये रवाना करोआया। इस मौके बोलदे होई उनें आखेआ।

<><><><><><>

Weather

मौसम विभाग नै जानकारी दिती ऐ जे पच्छमी हवाएं च बनी दी खोदल दे चलदे जम्मू-कश्मीर दे ज्यादातर इलाके च दरम्याने दर्जे दी बरखा ते बर्फबारी दी मेद दस्सी ऐ। औंदे 24 घटें दौरान जम्मू-कश्मीर दे केई सारे इलाकें च हल्के कोला दरम्याने दर्जे दी बरखा बरी सकदी ऐ ते केई इलाके च गर्जी चमकिए बारश होने दी पेशगोई कीती गेई ऐ। औंदे बाद 15 कोला 20 मार्च तोड़ी मौसम खुशक रौहने दी तवक्को ऐ।

<><><><><><>

Sangeet Sandhya

जम्मू-कश्मीर कला संस्कृति ते भाषा अकादमी आस्सेआ अज्ज संगीतकार हरिश कैला हुंदे संगीतबद् गीतें प आधारित “संगीत संध्या” दा सरिस्ता कीता गेआ जेदे च जम्मू-कश्मीर केंद्र शासित प्रदेश दे नामवर गायकें गीत गाइए मजूद लोकें दा मन परचाई लैता जिंदे च प्रो. सूरज सिंह, प्रो. कैलाश मेहरा ते होर दुए गायक शामिल हे। आकदमी दे कल्चर अफसर डा. शाहनवाज होरें आखेआ जे कला अकादमी मकामी कलाकारें, लखारिएं, कला प्रेमिएं ते कला संस्कृति भाषा कन्नै जुडे दे दे होरनें लोकें ते संस्थाएं गी बढावा देने लेई मता कम्म करा रदी ऐ।

<><><><><><>